

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)

CM-NITI AAYOG

NITI Aayog Governing Council vawi 10 inkhawmah chief minister Pu Lalduhoma chuan Thenzawl a khawpui din a duh thu a sawi.

Prime Minister Pu Narendra Modi kaihhruai a Delhi-a nimina NITI Aayog thuneitute thutkhawmnaah he thu hi sawiin Pu Lalduhoma chuan Mizoram mipui zatve ai a tam khawpuiah an cheng ni a sawiin khawpui a cheng zaa sawmriat chu Aizawlah an cheng mek a ni a ti a. Hemi avang hian Aizawl khawpui a tawt em em mai a. Mizoram thalaite hi huan lo ram neih leh thil siamchhuahna lama tam zawka an luhna tur dap a ngai a. He mi kawnga Mizoram mutan kheng thla turin khawpui thar, mipui nuai sawm atanga nuai sawmpanga vel khawsakna tur Thenzawl-Peace City din a duh thu a sawi a. He mi tipuitling tura Ministry of Housing & Urban Affairs an thlawp that avangin lawmthu a sawi a ni.

Chief minister chuan tun hnai lawkah Mizoram chu a mi chengte ziak leh chhiar thiam vek tawha puan a nih thu a sawi a. Hei hian Mizoram chu chhawr tlak mihring (human capital) lama a inbuatsaih nasatzia leh a hlawkpuizia a tilang a ni a ti a. Hna hmu lo chu za zela 2 point 2 chauh ni a sawiin, hnathawk zingah hmeichhiate chu za zela 45 lai an nih thu a sawi a. Thiam thil lamah pawh Mizoram chu a duai lo hle a, khawvel huap inelnaah India aiawh thei khawpa tha an awm niin a sawi.

Kum 2047 a khawvel ram hmasawn berte zinga tel tura inbuatsaihna Viksit Bharat 2047 a hlawhtlin theihna atan NITI Aayog State Support Missions kaltlangin Mizoram chuan chak takin hma a la niin Pu Lalduhoma chuan a sawi a. Department tin ruahmanna (action plan) thehluhtir an ni a, an ruahmanna siam theuh behchhan hian Mizoram hmathlir (Vision Document) buatsaih mek a nih thu leh rei loteah NITI Aayog a thehluh a nih tur thu a sawi a. Viksit Bharat 2047 atana Mizoram sorkar hmalakna langsar tak chu Bana Kaih ruahmanna a ni, a ti a. Ram hmasawanna atana thawhpuitlak (progress partner) te chu cheng nuai 50 thleng puktir theih an ni dawn a, an thawh that dan a zirin a pung awm lova pek an nih tur thu a sawi a. Tunah hian chutiang thawhpui chu a thawh khat nan mi 517 thlan fel an nih tawh thu a sawi a. Sorkar laipui ruahmannate nena kaldun zel tura duan a ni, a ti bawk.



INVESTMENT

Tourism minister Pu Lalnghinglova Hmar chuan sumdawng lian ho chu Mizoram lam rawn hawi turin a sawm.

Ministry of Development of North Eastern Region (DoNER) buatsaih ni 2 awh ‘Rising Northeast Investors Summit 2025’ tiak ni, nimin khan Pu Lalnghinglova Hmar chuan chawhma inkhawmah “Northeast: The New Hub of Tourism and Hospitality” thupui sawihona hunah thu sawiin, India hmarchhak pumpui chu Odisha aia mihring tlem zawk ni mahse khuarel mawina in a tuam vel, boruak thianghlim leh hnam ziarang hausa, zinmite lo mikhual tura theihna sang tak nei a ni, a ti a. ASEAN ram te nena inhnaih leh inkalpawh awlsam a ni a, Act East Policy hlawhtlinna atan pawh dinhmun pawimawh tak a luah a a ni, a ti a. Sumdawng liante chu hmarchhak lam hawi turin a sawm.

Pu Lalnghinglova Hmar chuan a bik takin Mizoram in adventure tourism ah theihna sang tak a nei a ti a. Mizoramin theihna a neih thu sawi ringawt duhtawh tawh lovin a taka chantir tumin theihtawpin Mizoram sorkarin hma a la mek niin a sawi a. Red Bull nen tangkawpin nikumah Asia rama Urban Downhill mountain bike intlansiak hmasa ber chu Aizawlah buatsaih a ni a, kuminah pawh buatsaih a nih leh dawn thu a sawi. Mizorama Krismas lawm dan, a bikin veng tin khaw tina ruaithch chu hmundanga awm ve lo, ram pawn thlenga tihlar leh zawrh tlak a nih thu a sawi a. Hmarchhak bial chu hmun kilkhawr a ni tawh lo ni a sawiin. Mizoram pawh Delhi atangin darkar hnih leh a chanve-ah a thlen theih a, Kolkata atang pheih chuan minute 45 chauh thlawk a ni a ti a. Aizawl kiang thleng rel a luh tawh dawn avangin sumdawng inpeipung duhte tan remchanna a inhawng dawn niin a sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



MANN KI BAAT

Prime Minister Narendra Modi-a’n Operation Sindoor chu khawvel hmun hrang hranga a firfiaka chetna do-na kawnga inrintawkna leh phurna thar siamtu a ni, a ti. Vawiin Akashvani-a Mann Ki Baat hun a hmanna-ah he thu hi sawiin huaisen taka Operation Sindoor thlaktu sipaite chu an fakawm tak zet a ni, a ti a, sipaiten an tum thelh miah lova ramri lehlama mifirfiakte tawm rukna an chhu chhe thei chu a ropui tak zet tih sawiin a firfiaka chetna titawp turin ram mipuite an inlungual vek a ni, a ti.

